

歲

時

廣

記

歲時廣記卷第十三

廣寒僊裔陳

元靚

編

月晦

荆楚歲時記曰每月皆有晦朔以正月晦爲
初年時俗重以爲節釋名曰晦者月盡之名
也晦灰也死爲灰月光盡似灰也南部新書
曰貞元元年九月二日敕方今邊隅無事烝
庶小康其正月晦日三月三日九月九日三
節日宜任文武百僚擇勝地追賞爲樂仍各

賜錢以充宴會貞元五年廢晦日置中和節

彫蓂莢

帝王世紀堯時有草夾階而生每月朔生一莢
月半則生十五莢自十六日一莢落至月晦而
盡彫月小盡則餘一莢厭而不落堯視之爲歷
唯盛德之君應和氣而生以爲瑞草名曰蓂莢
一名歷莢一名仙茆後魏盧元明晦日泛舟應
詔詩云輕灰吹上管落蓂飄下蒂遲遲春色華
曉曉年光麗

盡桂樹

虞喜安天論曰俗傳月中仙桂樹月初則生月晦則盡也

湔裙裳

荆楚歲時記元日至月晦人並爲酺食渡水士女悉湔裳酹酒于水湄以爲度厄今人唯晦日臨河解除婦人或湔裙

酺飲食

玉燭寶典元日至月晦並爲酺聚飲食士女泛

舟或臨水宴樂醺聚者大飲之名也一云出錢
爲醺出食爲醺

作膏糜

唐六典膳部有節日食料注云晦日膏糜

拔白髮

四時纂要正月甲子拔白髮晦日汲井水服令
髭髮不白

稼果樹

治生要術正月晦日日未出時以斧班駁錐斫

棗李樹則子繁而不落謂之祿樹

種冬瓜

齊民要術正月晦日倚牆區種冬瓜區圓二寸深五寸著糞種之苗生以柴引上牆每日午後澆之

占穀價

雜五行書正月晦日風雨主穀貴

避戰車

白氏六帖陣不違晦以犯天忌故戰車避晦日

也

號窮子

文宗備問昔顓帝時宮中生一子性不著完衣作新衣與之卽裂破以火燒穿著宮中號爲窮子其後以正月晦日死宮人葬之相謂曰今日送卻窮子也因此相承送之又圖經云池陽風俗以正月二十九日爲窮九日掃除屋室塵穢投之水中謂之送窮

除貧鬼

唐四時寶鑑高陽氏子好衣弊食糜正月晦日
巷死世作糜棄破衣是日祝於巷曰除貧也韓
文公送窮文云元和六年正月乙丑晦主人使
奴星星結柳作車縛草爲船載糗與棖牛繫輓
下引帆上檣三揖窮鬼而告之曰聞子行有日
矣鄙人不敢問所途躬具船與車備載糗糧日
吉時良利行四方子飯一孟子啜一觴攜朋挈
儔去故就新駕塵曠風與電爭先子無底滯之
尤我有資送之恩

送窮鬼

古今詞話太學有士人長于滑稽正月晦日以
芭蕉船送窮作臨江仙極有理致其詞曰莫恠
錢神容易致錢神盡是愚夫爲何此鬼卻相於
只由頻展義長是泣窮途韓氏有文曾餞汝臨
行慎莫躊躇青燈雙點照平湖蕉船從此逝相
共送陶朱予幼時亦聞巴談送窮鬼詞曰正月
月盡夕芭蕉船一隻燈盞兩隻明輝輝內裏更
有筵席奉勸郎君小娘子飽吃莫形迹每年只

有今日日願我做來稱意奉勸郎君小娘子空
去送窮鬼空去送窮鬼

中和節

李肇國史補曰唐貞元五年置中和節唐書
李泌傳曰德宗以前世上已重九皆大宴集
而寒食多與上已同時欲以二月爲節自我
作古李泌請以二月朔爲中和節道藏元微
集云二月一日爲天正節冲應太虛王真人
誠應妙遠郭真人同此日飛昇

代晦日

唐書貞元五年正月十一日詔曰四序喜辰歷
代增置漢宗上巳晉紀重陽或說禳除雖因舊
俗與眾燕樂誠洽當時朕以春方發生候維仲
月勾萌悉達天地和同俾其昭蘇宜均茂暢自
今後以二月一日爲中和節內外官司並休假
一日先敕百寮以三令節集會宜令中和節代
晦日白居易頌曰中者揆三陽之中和者酌四
氣之和茲以八九節七六氣排重陽而抗上巳

照元氣于厚壤則幽蟄蘇而勾萌達噓和風于窮荒則桀驚化而獷俗淳

揆明時

唐書貞元五年正月二十八日中書侍郎李泌奏伏以仲春初吉制佳節以□之更晦日於往月之終揆明時於來月之始請令文武百辟以是日進農書司農獻種桂王公戚里上春服士庶以刀尺相遺村社作中和酒祭勾芒聚會宴樂名爲享勾芒祈年穀仍望下各州府所在頒

行從之

賜宴會

李繁鄴侯家傳德宗曰前代三九皆有公會而
上巳日與寒食往往同時來年合是三月二日
寒食乃春無公會矣欲以二月創置一節何日
而可泌曰二月十五日以後雖是花時與寒食
相值二月一日正是桃李時又近晦日以晦爲
節非佳名也臣請以二月一日爲中和節其日
賜大臣方鎮勳戚尺謂之裁度令人家以青囊

盛百穀果實相問遺謂之獻生子醢酒謂之宜
春酒村閭祭勾芒神祈穀百僚進農書以示務
本上大悅卽令行之并與上已重陽謂之三令
節中外皆賜錢尋勝宴會

備物儀

文選時惟太平口乃初吉作爲令節以殷仲春
發輝陽和幽贊生植敬授人時亦以表節仲序
謂仲春也中和謂其節也助發生之德覃作解
之恩助陰陽之交泰表天地之和同當太平之

昭代屬初吉之良辰國家授時建節備物陳儀

遊曲江

唐輦下歲時記開元中都人遊賞於曲江莫盛
於中和上巳節按西京雜記朱雀街東第五街
皇城之東第三街昇道坊龍華尼寺南有流水
屈曲謂之曲江此地秦爲宜春苑在漢爲樂
遊原寰宇記云曲江漢武帝所造其水屈曲有
似廣陵之曲江故以名之

讌勝境

康駢劇談錄曲江地本秦隄州開元中疏鑿爲
勝境其南有紫雲樓芙蓉苑其西有杏園慈恩
寺花卉環列烟水四際都人遊玩盛于中和節
中和上已錫譙江側菰蒲葱翠柳陰四合碧波
紅蕖湛然可愛

隄卽確字
巨依反

賜御詩

唐書貞元六年德宗以中和節宴百寮於曲江
上賦詩以賜之百官皆和焉是歲戴叔倫遷容
州刺史素有詩名上乃令錄其詩以賜之詩曰

中和變柳梅萬彙生春光中和紀月令芳與天
地長耽樂豈不尙懿茲時景良庶遂亨毒恩同
致寰海康君臣永終始交泰符陰陽曲沼新水
碧華池桃梢芳勝賞信多歡戒之在無荒

作朝假

皇朝歲時雜記自唐中和節令唯作朝假亦不
休務然朝士自是日著單公服唯政事臣猶衣
夾袍入宮見上御單袍卽亟易之

視農事

唐文粹李庾西都賦曰立中和而視農

頒度量

白居易頒當晝夜平分之時頒度量合同之令

進牙尺

唐六典中尚署中和節日進鏤牙尺及木畫紫檀尺

有節物

文昌雜錄唐歲時節物二月一日則有迎富貴果子

瞎里厨

燕北雜記二月一日番中姓蕭者並請耶律姓者於本家筵席番呼此節爲瞎里厨漢人譯云瞎里是請厨是時

歲時廣記卷第十三

歲時廣記卷第十四

廣寒僊裔陳

元靚

編

二社日

禮記月令曰擇元日命民社注云爲祀社稷
春事興故祭之以祈農祥元日謂近春分先
後戊日元吉也統天萬年曆曰立春後五戊
爲春社立秋後五戊爲秋社如戊日立春立
秋則不算也一云春分日時在午時以前用
六戊在午時以後用五戊 國朝乃以五戊

爲定法紹興癸亥三月一日社紹興丙寅正月二十八日社

立社稷

白虎通德論王者所以有社稷何爲天下求福報功人非土不立非穀不食土地廣博不可徧敬五穀眾多不可一而祭故封土立社示有土也稷五穀之長故立稷而祭之也

祀社稷

國語其工氏之伯有九有也其子曰后土能平

九土故祀以爲社列山氏之有天下也其子曰柱能殖百穀故祀以爲稷

舉社稷

蔡邕獨斷社神蓋共工氏之子勾龍也能平水土帝顓頊之世舉以爲土正天下賴其功堯祠以爲社稷神蓋厲山氏之子柱也能植百穀帝顓頊之世舉以爲田正天下賴其功周弃亦播植百穀以稷五谷之長因以稷名其神也故封社稷露之者必受霜露以達天地之氣樹之者

尊而表之使人望見則加畏敬也

配社稷

禮記祭法曰厲山氏之有天下也其子曰農能植百穀夏之衰也周弃能繼之故祀以爲稷共工氏之霸九州也其子曰后土能平九州故祀以爲社

祠社神

風俗通謹按禮傳共工之子曰修好遠遊舟車所至足迹所達靡不窮覽故祀以爲社神

祭稷神

孝經緯社土地之主也土地闢不可盡祭故封土爲社以報功也稷五穀之長也穀衆不可徧祭故立稷神以祭之

五帝神

祭法顓帝祀勾龍爲社柱爲稷高辛氏唐虞夏皆因之殷湯爲旱遷柱而以周弃代之勾龍無可德者故止又郡國順天應人逆取順守而有慚德故革命創制改正易服變置社稷而後世

無及勾龍者故不可而止

成周社

周禮大司徒曰設其社稷之壝又曰血祭社稷
尙書召誥曰戊午乃社于新邑牛一羊一豕一

西漢社

西漢紀高祖三年二月命民除秦社稷立漢社
稷又通典曰漢高祖起禱豐枌榆社二年東擊
項籍還入關因命縣爲公社後四年天下定詔
御史令豐謹理枌榆社其後又令縣常以春二

月及臘祠后稷以羊羝民里社各自裁以祠

後漢社

後漢祭祀志光武建武二年立社稷於洛陽宗廟之左方壇無屋有門墻而已二月八月祠皆太牢郡縣置社稷太守令長侍祠用羊豕惟州所治有社無稷

魏國社

通典魏自漢後但大社有稷官社無稷故二社一稷也明帝景初中立帝社

兩晉社

通典晉武帝太康九年制曰社實一神其并二社之祀東晉元帝建武元年又依洛京二社一稷

南朝社

通典宋仍晉故齊武帝永明十一年脩儀其神一位北向稷東向齋官社壇東北南向立以西爲上諸執事西向以南爲上稷名大稷梁社稷在太廟西又加官稷并前爲五壇陳依梁而帝

社以三牲首餘以骨體薦焉

北朝社

通典後魏大興二年置太社大稷帝社於宗廟之右爲四方壇四陛以二月八月日用戊皆太牢勾龍配社周奔配稷北齊立太社帝社大稷三壇於國右每仲春仲秋元辰各以太牢祭焉後周立社稷於國左

隋朝社

通典隋文帝開皇初建社稷並列於含光門內

之右仲春仲秋吉戊各以一太牢祭焉牲色用黑郡縣並以少牢各祭百姓亦各爲社

唐朝社

通典唐社稷亦於含光門內之右仲春仲秋二時戊日祭太社太稷社以勾龍配稷以后土配武后天授三年九月爲社長安四年三月制社依舊用八月神龍元年致先農爲帝社壇於壇西立帝稷壇禮同太社大稷又唐志曰開元十九年停帝稷而祀神農氏於壇上以后稷配又

通典曰天寶三載詔社稷列爲中祀順系大猷
自今已後社稷升爲大祀寶曆六年敕中祀並
用少牢至貞元五年國子祭酒包佶奏請社稷
復依正祀用太牢從之

皇朝社

長編 太祖初有事於太社乃詔實儀定其儀
注儀以開元禮參酌於三代之典繼以進食之
際作雍和樂太社之饌白正門入配坐之饌白
左闔入皇帝詣罍洗之議如員丘又元龜云

真宗景德四年李維言天下祭社稷長吏多不親行事及闕三獻之禮甚非爲民祈福之意禮官申明舊典州縣祭社稷禮行三獻致齋三日東都事略云 徽宗崇甯二年詔曰自京師至于郡縣春秋祈禱唯社稷爲然今守令乃或器用弗備粢盛弗蠲其令監司察不如儀

天子社

蔡邕獨斷天子太社以五色土爲壇封諸侯者取其方面土苞以白茅授之各以其方色以立

社於其國故謂之授茅土漢興惟皇子封爲王
得茅土其他功臣以戶數租入爲節不授茅土
不立社也

王者社

祭法曰王爲羣姓立社曰太社王自爲立社曰
王社亡國之社曰亳社太社爲天下報功王社
爲京師報功也

諸侯社

祭法曰諸侯爲百姓立社曰國社諸侯自爲立

社曰侯社

大夫社

祭法大夫以下成羣立社曰置社立名雖異其神則同皆勾龍配之稷周弃配之

州縣社

國朝會要州縣祭社稷儀自祥符中定之又嘉泰事類云諸州縣春秋社日祭社稷社以后土勾龍配稷以后稷氏配牲用羊一豕一黑幣二官司假甯一日

春秋社

提要錄 國朝張文琮出爲建州刺史州尙淫祠不立社稷文琮乃下教曰春秋二社本于農今此州廢而不立尙何觀焉於是始建祀場

建酉社

晉嵇含社賦序社之在於世尙矣自天子至於庶人莫不咸用有漢卜曰丙午魏氏釋用丁未至于大晉則社孟月之酉日各因其行運三代固有不同雖其奉社而莫議社之所由興也說

文云祈請道神爲之社後漢蔡邕祝社文曰元
正令午時惟嘉良乾坤交泰太簇運陽乃祀社
靈以祈福祥晉應碩祝社文曰元首肇建吉酉
辰良命于嘉賓宴茲社箱敬享社君休祚是將

用未社

魏臺訪議帝問何用未社丑臘王肅曰魏土也
畏木丑之明日便寅寅木也故以丑臘土成於
未故歲始未社也

結綜社

荆楚歲時記社日四鄰並結綵會社牲醪爲屋
於樹下先祭神然後享其胙鄭氏云百家共一
社白虎通云社稷有樹表功也

雞豚社

韓文公詩願爲同社人雞豚宴春秋陳簡齋詩
云盍簪共結雞豚社一笑相從萬事休又云要
爲同社宴春秋方伯休詩云稻葉青青水滿塍
夕陽林下賽田神投身便入雞豚社老去人間
懶問津

歌載芟

詩載芟春籍田而祈社稷也

頌良耜

詩良耜秋報社稷也

達天氣

禮記天子太社必受霜露風雨以達天地之氣
社所以親地也地載萬物也天垂象取法於天
所以尊天親地也社供粢盛所以報本反始也

神地道

禮記云社所以神地道也取地于天是以尊天而親地故教人美報焉

撰祝文

玉壺清話 太祖初有事於太社時國中隆興多或未修太社祝文亦亡舊式詔詞臣各撰一文謄錄糊名以進上覽之謂左右曰皆輕重失中由御筆親點一文曰惟此庶乎得體開視之乃寶儀撰者文曰惟某年太歲月朔日宋天子某敢昭告于太社謹因仲春仲秋祇率常禮敬

以玉帛一元大武柔毛剛鬣明塗香其嘉薦醴
馨猶茲禋禋用伸報本敢以后土勾龍氏配神
位惟神品物賴之載生庶類資以含宏方直所
以著其首博厚所以兼其德有社者敢忘報乎
尙享遂詔定其儀

享壽星

國朝會要景德三年七月王欽若言禮記月令
八月命有司秋分享壽星于南郊唐開元二十
四年七月敕所司置壽星壇祭老人星及角亢

七宿今百神咸秩而獨略壽星望俾崇祀禮院
言壽星南極老人星也爾雅云壽星角亢也注
云數起角亢列宿之長故云唐開元中上封事
者言月令八月日月會于壽星居列宿之長請
八月社日配壽星于太社壇享之當時遂敕特
置壽星壇

報勳庸

何承天社頌社實陰祇稷惟穀先霸德方將時
號其工廠有才子實曰勾龍陶唐救災決河疏

江奔亦播殖作乂萬邦克配二社以報勳庸

求豐年

曹植社頌於惟太社官名后土是曰勾龍功著
上古德配帝皇實爲靈主克明播植農政曰柱
尊以作稷豐年是與義與社同方神此宇

卜禾稼

周禮春官肆師社之日涖卜來歲之稼

祈稔盛

隋牛弘社歌厚地間靈方壇崇祀建以風露樹

之松梓勾萌旣申芟柞伊始恭祈黍稷盛荐膺休
祉

飲福杯

倦游錄 京師祭社多差近臣王禹玉在兩禁
二十年熙甯間復被差題詩於齋宮曰隣雞未
動曉驂催又向靈壇飲福杯白笑治堇知不足
明年強健更重來

治堇酒

海錄碎事俗言社日酒治堇倦游錄云楊尙書

以耳聾致仕居鄆縣別業同里高氏貲厚有二
子小字大馬小馬一日里中社飲小馬攜酒一
榼就楊公曰此社酒善治聾願侍杯杓之餘添
楊書絕句與之云數十年來聾耳噴可將社酒
便能醫一心更願青盲了免見高家小馬兒杜
社日詩云共醉治聾酒兵部李濤詩云社翁今
日沒心情爲乏治聾酒一瓶李濤字社翁

造環餅

皇朝歲時雜記社日舊四方館先期下御厨

造大環餅白熟餅蒸豚并以酒賜近臣大率與
立春同白居易有社賜酒餅狀想唐亦有此賜
也

作餽餅

歲時雜記社日人家旋作餽餅佐以生菜韭豚
肉

賜社飯

歲時雜記社日有漫潑飯加之雞餅青蒿芜荑
韭以蔽之亦嘗出自中禁以賜近輔

送社饅

東京夢華錄社日以社饅社酒相賁送貴戚宮院以猪羊曲腰子嫋房肚肺鴨餅瓜薑之類切作棋子片樣滋味調和鋪於飯上謂之社飯

宰社肉

漢陳平傳里中社平爲宰分肉甚均里父老曰善陳孺子之爲宰平曰使平得宰天下亦如此肉矣杜甫社日詩云陳平亦分肉太史竟論功翁起予社日卽事云平生宰肉手老矣任乾坤

殺社豬

劉貢父詩話張端爲河南司錄府當祭社買豬
已呈尹豬突入端卽殺之史以白尹尹召問端
對曰按律諸無故夜入人家主人登時殺之勿
論尹大笑爲別市豬

贖社狗

法苑珠林隋大業八年宜州城民皇甫遷多盜
母錢死之日其家猪生一狔子八月社賣與遠
村遂託夢於婦曰我是汝夫爲盜取婆錢令作

猶償債將賣與社家縛殺汝是我婦何忍不語
寤而報姑姑夢亦如之遲明令兄賞錢就社官
收贖之後二年自死

噴社酒

本草云社酒噴屋四壁去蚊蟲納小兒口中令
速語此祭祀餘酒者也

飲社錢

東京夢華錄社日市學先生預斂諸生錢作社
會以致雇倩祇應白席歌唱之人歸時各攜花

籃果實食物社饌而散

罷社祭

魏志王脩字叔治年七歲母以社日亡來歲隣里社脩感念母悲哀其隣里爲罷社

值社會

武陵先賢傳潘京爲州辟進謁值社會因得見次及探得不孝刺史問曰辟士爲不孝耶京舉版荅曰今爲忠臣不得復爲孝子其機辯如此

降社雨

提要錄社公社母不食舊水故社日必有雨謂
之社翁雨陸龜蒙詩云幾點社翁雨一番花信
風又云社日雨社公以之沐髮李御史社日書
懷云社公沐髮望年豐豈謂雨餘仍苦風

種社瓜

齊民要術種絲瓜社日爲上又云社日以杵舂
百果樹下則結實牢不實者亦宜用此法

放社假

嘉泰事類假甯格二社假一日

戒兒女

歲時雜記社日人家皆戒兒女風興以舊俗相傳苟宴起則社翁社婆遺糞其面上其後而黃者是其驗也

宜外甥

東京夢華錄社日人家婦女皆歸外家晚卽歸外翁姨舅皆以新葫蘆兒棗兒爲遺俗云是日歸甯宜外甥

求計算

歲時雜記社日小學生以葱繫竹竿上於窗中觸之謂之開聰明或又加之以蒜欲求能計算也

忌學業

歲時雜記社日學生皆給假幼女輟女工云是日不廢業令人矍矍

乞聰明

提要錄稚子社日爬溝乞聰明江浙間風俗也御史李方叔社日書懷云社公沐髮望年豐豈

謂雨餘仍苦風未報田間禾穎秀但驚堂上燕
巢空里人分胙祈微福稚子爬溝擬乞聰老病
不知秋過半謾芻新釀要治聾李御史之集洪
景盧舍人爲其序云

同俚俗

李伯時春社出郊書事千尋古櫟笑聲中此日
春風屬社公開眼已憐花壓帽放懷聊喜酒治
聾攜刀割肉餘風在卜瓦傳神俚俗同聞說已
栽桃李徑隔溪遙認淺深紅此詩見唐宋詩選

未詳卜瓦傳神事

不食蠶

歲時雜記社日食蠶則至初昏拜翁姑時腰響
或云立春日忌此

得黃金

搜神記後漢有應姬生四子見神光照社試探
之乃得黃金白是諸子官學並有才名

取天劍

錄異傳賀瑀死三日蘇云上天入官府典房有

卽有劍使瑀唯意取之瑀取劍出門問何得云
得劍曰唯使社公耳

飲神酒

夷堅丙志乾道初元衡山民以社日祀神飲酒
大醉至暮獨歸跌於田坎水中恍忽如狂急緣
田墜行至其家已閉門矣扣之不應身自從隙
中能入妻在牀績麻二子戲于前妻時時咄罵
其夫暮夜不還舍民叫曰我在此妻殊不聞繼
以怒罵亦不荅民驚曰得非已死乎遽趨出經

家先香火位過望父祖列坐其所泣拜以告其父曰勿恐吾爲汝懇土地卽起俄土地神至布衣草屨全如田夫狀具問所以顧小童令隨民去相從出門尋元路復至坎下教民自抱其身大呼數聲歷然而寤時妻以夫深夜在外倩隣人持火索之適至其處遂與俱歸

乞社語

啟顏錄千字文語乞社云敬白社官三老等竊聞政本於農當須務滋稼穡若不雲騰致雨何

以稅熟貢新聖上臣伏羌戎愛育黎首用能閑
餘成歲律呂調陽某人等並景行維賢德建名
立遂乃肆筵設席祭祀蒸嘗鼓瑟吹笙絃歌酒
宴上和下睦悅豫且康禮別尊卑樂殊貴賤酒
則川流不息肉則似蘭斯馨非直榮重芥藿兼
亦果珍李柰莫不矯首頓足俱共接盃舉觴豈
徒戚謝歡招信乃福緣善慶但某乙索居閑處
孤陋寡聞雖復屬耳垣墻未曾攝職從政不能
堅持雅操專欲逐物意移憶肉則執熱願涼思

酒如骸垢想浴老人則飽飫烹宰某乙則飢厭
糟糠欽風則空谷傳聲仰惠則虛堂習聽脫蒙
仁慈隱惻庶可濟弱扶傾希垂顧答審詳望減
藥荷滴漚某乙則稽顙再拜終冀勒碑刻銘但
知悚懼恐惶實若臨深履薄

歲時廣記卷第十四

歲時廣記卷第十五

廣寒僊裔陳

元靚

編

寒食上

荆楚歲時記曰去冬至一百五日卽有疾風甚雨謂之寒食據曆合在清明前二日亦有去冬至一百六日者禁火三日今謂之禁烟節是也又謂之百五節洪舍人容齋五筆云今人謂寒食爲一百五日以其自冬至之後至清明歷節氣五凡爲一百七日而先兩日

爲寒食故云他節皆不然也提要錄云秦人
呼寒食爲熟食日言其不動烟火預辦熟食
過節也齊人呼爲冷烟節王君玉詩云疾風
甚雨青春老瘦馬疲牛綠野深又明老詩藁
中寒食有句云疾風甚雨悲遊子峻嶺崇岡
非故鄉又胡仔詩云飛絮落花春向晚疾風
甚雨暮生寒陳去非道中寒食云飛絮春猶
冷離家食更寒

歲時雜記去冬至一百三日爲炊食熟以將禁
烟則饗殮當先具也而以是日沐浴者因其炊
熟之盛又從此三日無燂湯之具也 慶厯中
京師人家庖厨滅火者三日各於密室中烹炮
爾後稍緩矣

百四日

歲時雜記引假甯格清明前二日爲寒食節前
後各三日凡假七日而民間以一百四日始禁
火謂之私寒食又謂之大寒食北人皆以此日

掃祭先塋經月不絕俗有寒食一月節之諺

百五日

東京夢華錄尋常京師以冬至後一百五日爲
大寒食歲時雜記又謂之官寒食 國朝舊制
冬正寒食爲三大節縱民間蒲博三日江西宗
派詩云一百五日足風雨三十六峰勞夢魂姚
合寒食詩云今朝一百五出戶雨初晴子由寒
食前一日寄子瞻云寒食明朝一百五誰家再
冉尙厨煙

百六日

歲時雜記斷火三日者謂冬至後一百四日一百五日一百六日也百六日乃小寒食也杜甫小寒食日詩云佳辰強飲食猶寒旣云食猶寒則是一百六日也元稹連昌宮詞云初過寒食一百六店舍無煙宮樹綠則一百六者禁煙之第三日也又東坡詩云細雨晴時一百六畫船鼙鼓莫違民容齋四筆云吾州城北芝山寺爲禁烟遊賞之地寺僧建華嚴閣請予作勸緣疏

其末一聯云大善知識五十三永壯人天之仰
寒食清明一百六鼎來道俗之觀又李正封洛
陽清明雨霽詩云曉日清明天夜來嵩少雨千
門上燈火九陌無塵土則是百十日開火禁爲
清明而前三日禁火明矣

介之推

春秋僖公二十四年晉侯賞從亡者介之推不
言祿祿亦勿及之推曰身將隱焉用文母曰與
汝偕隱遂隱而死晉侯求之不獲以綿上爲之

田曰以志吾過且旌善人

介子綏

琴操晉文公與子綏俱遁子綏割腓股以啖文
公文公復國子綏無所得怨恨作龍蛇之歌而
隱文公求之不肯出乃燔山求之子綏抱木而
死文公哀之令民五月五日不得舉火子綏卽
推也

介子推

劉向新序晉文公反國召舅犯而將之召艾陵

而相之介子推無爵推曰有龍矯矯將失其所
有蛇從之周流天下龍入深淵得安其所有蛇
從之獨不得甘雨遂去而之介山之上文公求
之不獲乃焚山求之子推燒死因禁火以報之
呂夷簡寒食詩云人爲子推初禁火

介子推

劉向列仙傳介子推晉人也隱居無名晉公子
重耳異之與出居外十餘年勞而不辭及還介
山伯子常晨來呼推曰可去矣推辭祿與母入

山中從伯常遊後文公遣數千人以玉帛求之
不出

潔惠侯

翰府名談潔惠侯記云汾州靈巖縣東有山曰
綿田山下有潔惠侯廟 朝廷錫之號其神乃
世謂介子推也昔文公遭驪姬之難削跡燕趙
竄身齊楚山潛水伏晝隱暮興周流天下起居
坐臥跋涉不捨者十九年惟子推一人而已洎
文公復國子犯輩無功而俱受官爵獨遺子推

國人哀其有德於君而不見用因代子推爲歌而懸之國門云龍欲上天五蛇爲輔龍已升雲四蛇各入其宇一蛇終不見處所文公見之曰此必子推之言也乃思其人而用之子推乃請于母曰就仕乎不仕乎母曰二者汝宜深惟之與其俯就一時之祿不若成萬世之名子推乃入綿田山不出文公遣人焚山意子推避火出山是日烈風火勢雷動玉石俱焚草木盡灰子推竟身爲樵戶里人憫子推之節義橫天而不

得用乃記其死日一區陽來復一百五日也至其日不舉火不炊餽咸食冷物自茲其日爲寒食也迄今天下皆如此自洪河之北尤重此節先期數日具膳滅火封竈無少長咸食冷食靈巖之民尤爲謹畏故舉火造飯雷電卽至其家山之頂有地數畝土石色焦亦若新過火焉

妬女廟

朝野僉載并州石艾壽陽二界有妬女泉有神廟泉漢水深沉潔澈千丈祭者投錢及羊骨鮫

然皆見俗傳妬女者介之推妹與兄競去泉百
里寒食不許斷木至今猶然女錦衣紅鮮裝束
盛服及有人取山丹百合經過者必雷風電雹
以震之

噪仁鳥

王子年拾遺記晉文公焚林以求介推有白鴉
繞烟而噪或集介子之側火不能焚晉人嘉之
起一高臺名曰思賢臺或云戒所焚之山數百
里不得設網呼曰仁鳥俗亦謂鳥白臆者爲慈

烏則其類也又拾遺記云文公焚山求子推時
有白鳥烟中斃

製木履

殷芸小說曰介之推不出晉文公焚林求之抱
木而死公撫之盡哀乃伐木製履每俯視則流
涕曰悲乎足下

絕火食

魏武帝明罰令問太原上黨西河雁門冬至後
百五日皆絕火食寒云爲介子推且北方沍寒

之地老少羸弱將有不堪之患令人不得寒食
犯者家長半歲刑主吏百日刑令長奪一月俸

預溫食

後漢周舉傳周舉遷并州刺史太原一郡舊俗
以介子推焚骸有龍忌之禁至其亡月咸言神
靈禁舉火由是士民每冬中輒一月寒食莫敢
烟爨老少不堪歲多死者舉旣到州乃作弔書
置子推廟言盛冬禁火殘損民命非賢者之意
以宣示愚民使還預溫食由是眾咸少解風俗

頓平注云龍星木之位也春見東方心爲火心
懼火之盛故爲之禁俗傳云子推此日被焚故
禁火也容齋三筆云然則所謂寒食乃是中冬
非節令二三月也

辦冷食

鄴中記并州俗冬至後一百五日爲介子推斷
火冷食三日作乾粥今之糗是也又荆楚歲時
記云昔介子推三月五日爲火所焚并人哀之
每歲春莫爲不舉火因以寒食至今晉人重此

禁云犯之則雨雹傷其田

進寒食

汝南先賢傳太原舊俗以介子推焚骸一月寒食莫敢烟爨又奇應錄云太原舊以介子推登山燔燎一月禁火至趙石勒建平中廢之暴風折木壞田

嚴火禁

歲時雜記 元豐初官鎮陽鎮陽距太原數百里寒食火禁甚嚴有輒犯者閭里記其姓名忿

遇風雹傷稼則造其家眾口交徧謫之殆不能
自容以是相率不敢犯 紹聖年來江淮之南
寂無此風聞二瀾民俗以養火蠶亦於寒食日
火云

修火禁

太平御覽云周舉移書及魏武罰令陸翹鄴中
記並云寒食斷火起于子推琴操所言子綏卽
推也又云五月五日與令有異皆因流俗所傳
據左傳及史記並無介子推被焚之事按周禮

司烜氏仲春以木鐸修火禁於國中注云謂季春將出火也今寒食節氣是仲春之末清明是三月之初然則禁火蓋周之舊制河南程氏外書載伊川先生曰寒食禁火只是將出新火必盡熄天下之火然後出之也世間風俗蓋訛謬之甚耳

煮粳酪

鄴中記寒食三日作醴酪又煮粳米及麥爲酪搗杏仁煮作粥孫楚祭子推文云黍飯一盤醴

酪一盂清泉甘水充君之厨今寒食節物有杏
酪麥粥卽其遺風也又見荆楚歲時記東坡詩
云火冷餠稀杏粥稠韋蘇州詩云杏粥猶堪食
榆羹已可煎崔魯春日詩云杏酪漸看隣舍粥
榆烟欲變舊爐灰

作麥粥

玉燭寶典今人寒食悉爲大麥粥研杏仁爲酪
引餠以沃之白樂天詩云留餠和冷粥出火煮
新茶李義山詩云粥香餠白杏花天宋子京詩

云漠漠輕花著早桐客甌餠粥對禺中歐陽公
詩云杯盤餠粥春風冷池館榆錢夜雨新又云
多病正愁餠粥冷又云已改煎茶火猶調入粥
餠

爲醴餠

歲華紀麗寒食作醴酪以大粳米或大麥爲之
卽今之麥粥也醴卽今之餠是也宋考功詩云
馬上逢寒食春來不見餠洛中逢甲子何日是
清明又沈雲卿詠驩州不作寒食云海外無寒

食春來不見餠江西詩體云齒軟不禁寒食餠

賣稠餠

東京夢華錄一百五日都城賣稠餠麥糕乳粥
酪乳餅之類最盛東坡詩云不比賣餠人又有
吹簫賣餠事宋子京寒食詩云草色引開盤馬
路簫聲吹暖賣餠天梅聖俞詩云千門走馬將
開榜廣市吹簫尚賣餠藜藿野人寒食詩云流
水有人題墜葉吹簫何處賣煎餠

染青飯

零陵總記楊桐葉細冬青臨水生者尤茂居人
遇寒食採其葉染飯色青而有光食之資陽氣
謂之楊桐飯道家謂之青精乾石飢飯彭祖云
大宛有青精先生青靈真人霍山道士艷伯元
者受青精飯法能冥中夜書陶隱居登真隱訣
云太極真人青精乾石飢飯法方授王褒又圓
散十法中有精石飯注云上仙靈方服之令人
童顏杜甫詩云豈無青精飯使我顏色好皮日
休詩云半月始齋青飢飯東坡詩云赤松餽青

精飢謝伯任云諸書並無飢字按道藏經音義云飢一作規亦作飢並音信又音峻赤松赤松也

炊紺飯

登真隱訣神仙王君青飢飯方云此飯用白米一斛五斗得稻有青衣佳如豫章西山青米吳越青龍稻米是也蓋青米裏虛而受氣故堪用之取南燭草木葉五斤煮汁漬米炊卽洒之令飯作紺青也服二合填胃補髓殺三蟲神仙食之按本草木部有南燭枝久服輕身長年令人

不飢能益顏色取汁炊飯名烏飯又名黑飯唐
高宗幸嵩山至逍遙谷見室中大瓠問潘師正
荅曰中有青飢昔西城王君以南燭草爲之服
食得道乃命道士葉法善往江東造青飢飯變
白去老取莖葉搗碎漬汁浸粳米九浸九蒸九
暴米粒緊小正黑如瑩珠袋盛之可適遠方日
進一合不飢益顏色堅筋骨能行取汁炊飯名
烏飯亦名烏草亦名牛筋言食之健如牛筋也
色赤名文燭生高山經冬不凋日華子云名烏

飯草又名南燭鄭畋詩云圓明青飢飯光潤碧霞樂山谷詩云飢蒙青飢飯寒贈紫陀衣

造棗餠

東京夢華錄京師以寒食前一日謂之炊熟用麴造棗餠飛燕柳條串之插於門楣謂之子推燕又呂原明歲時雜記云以棗麴爲餅如此地棗菰而小謂之子推穿以楊枝插之戶間而不知何得此名也或謂昔人以此祭介子推正猶角黍祭屈原焉藝苑雌黃云以麴爲蒸餅樣團

棗圻之名曰棗餠

蒸糯米

歲時雜記寒食以糯米合采蒻葉裹以蒸之或加以魚肉鵝鴨卵等又有置艾一葉于其下者

凍薑豉

歲時雜記寒食煮豚肉并汁露頓候其凍取之謂之薑豉以荐餅而食之或剗以七或裁以刀調以薑豉故名焉

鏤雞子

唐史寒食進雜綵雞子景龍文館記云寒食賜
鏤雞子玉燭寶典曰寒食節城市尤多鬪雞卵
之戲管子曰雕卵熟斲之所以發積藏散萬物

畫鴨卵

鄴中記寒食日俗畫鴨子以相餉張衡南都賦
曰春卵夏筍秋韭冬菁

畜食品

歲時雜記京都寒食多畜食品故諺有寒食十
八頓之說又云饑婦思寒食懶婦思正月蓋正

月多禁忌女工也

煮臘肉

歲時雜記去歲腊月糟豚肉掛竈上至寒食取以啖之或蒸或煮其味甚珍

設饌餅

尙書故實晉書中有飯食名寒具者亦無注解處後於齊民要術并食經中檢得是今所謂饌餅也柏玄嘗或陳法書名畫請客有食寒具不濯手而執書畫因有浣玄不懌自是會客不設

寒具

供良醢

秦中歲時記寒食內宴宰執以醢醢酒王立之
詩話云醢醢本酒名也以花顏色倡之故取以
爲名按唐百官志良醢署令進御則供醢醢桑
落之酒

飲梨花

雲齊廣錄汝陽溪穆清叔因寒食縱步郊外見
數少年共飲於梨花下穆長揖就坐眾皆哂之

或曰能詩否卽以香輪莫碾青青破畱與愁人
一醉眠爲韻各賦梨花詩清叔得愁字詩曰共
飲梨花下梨花插滿頭清香來玉樹白蜚泛金
甌粧靚青娥妬光凝粉蝶羞年年寒食夜吟繞
不勝愁眾客閣筆東坡詩云梨花寒食隔江路
又古詩云梨花寒食天陳簡齋詩云寒食清明
驚客意暖風遲日醉梨花

插柳枝

歲時雜記今人寒食節家家折柳插門上唯江

淮之間尤盛無一家不插者北人稍辦者又加以子推

裝花輿

金門歲節寒食裝萬花輿煮楊花粥

掛暑麪

瑣碎錄寒食日以紙袋盛麪當風處中暑調水飲之

服強飭

外臺秘要治蛟龍瘕寒食飭三升每服五合日

三服遂吐蛟龍開皇六年有人正月食芹得之其病發似癰面色青黃服寒食強飭二升日三吐出蛟龍有兩頭及尾是其驗也

燒飯灰

本草寒食飯主滅癰瘰有舊瘰及雜瘡並細研傅之飯灰主病後食病又云寒食大麥粥有小毒主咳嗽下熱氣調中和杏仁作之佳也

畜井水

歲時雜記世傳婦人死於產蓐者其鬼唯於百

五日得白湍濯故人家前一日皆畜水是日不上井以避之

設梭門

歲時雜記人間舊不知梭門之制元豐年修景靈宮十一殿成其國忌日適在寒食節假中者百官趨行香見梭門與鞦韆並建於庭中梭門似毬門而小但不見設梭

畫圖卷

新唐書藝文志談皎畫武惠妃舞圖佳麗寒食

圖佳麗伎樂圖一卷談氏家傳云開元中有皎
者善畫

看花局

釋仲殊花品序每歲禁烟前後遲日融和花既
勞矣人亦樂矣於是置酒饌命樂工以待寶賞
花者不問親疎謂之看花局故里諺云彈琴種
花陪酒陪歌

改詩歌

烏臺詩話東坡與郭生遊於寒溪主簿吳亮置

酒郭生善作挽歌酒酣發聲坐爲悽然郭生言
恨無佳詞因爲略改樂天寒食詩歌之坐客有
泣者其詞曰烏鵲噪昏喬木清明寒食誰家
哭風吹曠野帋錢飛古墓纍纍春草綠棠梨花
映白楊路盡是死生離別處冥漠重泉哭不聞
蕭蕭暮雨人歸去每句雜以散聲

遵唐律

說苑興國中高昌入貢言其國有唐敕律開元
九年三月九日寒食至今遵用之

用唐曆

揮塵前錄 太平興國六年五月詔遣供奉官
王延德殿前承旨白勳使高昌七年四月乃至
高昌入年春與其謝恩使凡百餘人循舊路而
還雍熙元年四月至京師延德等敘其行程來
上云高昌用開元七年曆以三月九日爲寒食
餘二社冬至亦然以銀或鎗爲筒貯水激以相
射或以水交潑爲戲謂之壓陽氣去病

歲時廣記卷第十五